

I na dat

betg pli Rumantschs!

Charta da lectur or da la California

Basta. Ussa basta. Jau sun puspè stà schoccà. Jau sto però declerar quai dal cumenzament: Tschel di hai jau legì en las PUNTS ch'ins sa empustar il nov dc dals giuvens Rumantschs e natiralmain era da las giuvnas Rumantschas (schebain ch'jau sun stà stut da vesair ubain udir ch'i dat be chantadurs masculins).

Jau hai ditg a mia dunna: "Dalunga empustar . . . Quella na alura prendì ina carta postala ed ha tramess quella per air-mail sur il Atlantic vi.

Suenter be pacs dis è alura vegnì il pachet cun en il dc. Jau hai mess il dc en mia stereo. Ed jau stoss ussa dir, era sche mia dunna di adina ch'jau saja in criticunz, che quai che ils giuvens Rumantschs chantan n'è betg mal. Propi super! Surtut il Elton John rumantsch plascha a mai.

Però suenter è vegnì il grond schoc – il quint: "Anbei schicke ich Ihnen die bestellte CD "Revoluziun". Ich hoffe, dass Sie viel Spass beim Reinhören haben werden." Sche quel che ha scritg quellas pèr lingias savess cun tge "Spass" ch'jau hai legì sia chartetta, alura stess quel be stut. Crajan ils Rumantschs in summa ch'ins chapescha betg rumantsch en America, ni en California? Jau hai alura mussà a mia dunna il quint tudestg. Quella ha dalunga cumenzà a cridar. Jau hai vulì calmar ella. Però ella ha be ditg: "Nus essan uschè ditg davent da la terra rumantscha. Igl è memia tard, i na dat betg pli Rumantschs!" Quai è alura stà mes segund schoc da quel di, ed jau sun vegnì tut malsegir. Na datti propi betg pli Rumantschs, sche gnanc il quint dals grooves rumantschs na vegn pli scritg en rumantsch?

Ma basta, jau hai alura telefonà a chasa tar ils mes e quattras savi metter mes cor puspè en pasch.

Perquai per finir anc insatge pli divertent:
Sche en tudestg è il quint "revoluziunari",
alura ha scritg quel in pover larifari!

Cun chars salids
Voss Men Caduff